

醫函津

同里呂景端書檢



武進錢心榮先生輯

醫 津

同縣呂景端敬題



壬戌七月
貽直堂刊



序

武進錢氏以良醫名於世者代不乏人而
心榮先生醫名尤噪一時生平著有醫津一書
首論脈法作診脈主病等篇五十有三附以治
法於陰陽偏正之理剛柔進退之道虛實攻守
之法培養利導之勢無不旁徵博引縷晰條分
殆鑒夫近世醫道之不明慨然發救世之婆心
乃有是書之集也先生文孫同增昆季將壽之
梨棗以垂不朽屬余序之余雖不知醫然因是



之圭臬金鍼度世洵醫學之津梁也願後之學者小則以之壽人大則以之壽世毋負先生著書之旨也可古語云醫不三世不服其藥今同增亦以醫名於時知其淵源家學克繩祖武先生之貽謀遠矣故樂得而爲之序

民國十一年十一月貴池姚浚叙於武進官廨



序

自古醫學之書傳之爲經黃帝素問張機傷寒
論大抵學醫者皆手置一編惟其文辨析精微
詞致簡遠讀者不能遽曉至國朝葉天士徐
靈胎兩先生所著葉氏醫案臨證指南兩書出
一則純主性靈一則似多泥古如詩人之李杜
文字之韓蘇也毘陵素產名醫孟河費伯雄馬
培之兩君均以醫聞于世而郡中錢氏則祖孫
相繼累世俱以醫著一鄉雖婦人孺子莫不知



錢氏爲當世和緩至今弗替蓋錢氏承其家學
固不止醫不三世也錢子同增醫之傑出者日
者出其先德心榮先生所著醫津示余並乞
爲之序余向不知醫今讀其書首脈訣次病情
終治法覺所言但論病源不載方藥蓋猶素問
傷寒論之例歟方今歐化東漸競尙西法古人
醫藥精理迨將衰歇錢君今刻此書實初學之
津梁救世之寶筏亦豈止顯親揚名惟求傳世
而已哉 癸亥十月江陰金武祥時年

八十
有三

序

有學力而無天資未免流於固執有天資而無學力每多自悞聰明伊古以來羿之射僚之丸秋之奕嵇之琴以及劉褒圖畫張旭草書罔不各盡其天然之資當然之理以成一藝之名故至今猶嘖嘖人口若夫醫雖云小道而有功於世非他可擬况味藥始於神農素問肇自黃帝至漢張長沙集醫藥之大成遂復乎莫及蓋醫以仲景爲宗猶儒之師法宣尼也吾友錢君同

增以 先德心榮先生所著醫津一書索序於
予予於先生往還極稔今閱此書卓然想見其
爲人且益信先生固別有可傳者在初不待藉
此以傳然是書洵足爲初學之津梁救世之寶
筏也扁鵲云人之所病病疾多醫之所病病道
少吾竊歎良醫不數覲而庸醫舉目皆是彼業
醫者偏自信爲良而不自知其庸且不知有道
者竊笑於後焉嗚呼湯武之征誅孔孟之道德
皆所以救民濟世范文正謂不爲良相即爲良

醫蓋有慨乎其言之際此國步艱危苟有人起而醫之亦何來病夫國之誚哉今同增亦以醫鳴於時繩其祖武後先輝映信乎家學淵源其來有自矣予於醫雖未得其道及觀脈訣諸作其於古也能好而不背法而不泥不徒濟世兼可以傳世焉此非天資學力兼到者不克臻此安得以小道目之質之當世知醫者以爲何如是爲序

丁巳首夏樗園惲彥彬

時年政八十

序

吾常之以善醫名於古者有唐之許循宗惜未
有著述然其醫者意也一語後世之爲醫者卒
莫能外近代醫學益著吾邑百年以來則以
錢心榮先生爲巨擘先生年長於余相交有素
而又誼關姻婭惜余飢馳四方里居日少未能
訪其遺著讀之頗以爲憾比年謬董醫局與文
孫同增過從日密日者出示先生所著醫津一
書乃知先生學之精邃名實足以副之而益歎



同增之善繼善述淵源有自焉是書詳論脈法
附以病情治法蓋深得本末先後之旨者即證
諸許循宗病與脈俱藥與病值之論亦適相照
合其篇中六經形證脈治一章於標本陰陽之
分辨之明論之確尤爲精闢貫澈言人之所未
能言驪珠在握度盡金鍼已難經云脈而知之
謂之巧韓子云善醫者不視人之肥瘠亦察其
脈之病而已矣先生有焉然則是書之必傳也
更無疑矣因綴數語歸之並趣同增亟付諸梓

以餉後學云

壬戌七月八十五叟朱承先拜序

醫

書

序

七

錢氏貽直堂刊



醫

津

日進印刷所代印



北京中医药大学图书馆版权所有

序

曲禮曰醫不三世不服其藥吾尋繹其醫必
世一語而知醫理精深非有家學淵源者不能
培其根柢也東坡先生題張寺丞益齋詩中有
句云張子作齋舍而以益爲名譬如學醫人識
病由飽更風雨晦明淫跛蹙瘖聾盲虛實在其
脈靜躁在其情榮枯在其色壽夭在其形苟能
閱千人望見知死生吾研究其識病由飽更一
語而歎病情之變幻非飽有經驗者不能奏其



功效也然則醫敢云小道乎哉吾常爲聲明文
物之邦前清康熙乾嘉以來經學史學詩學詞
章學代有名人卽以醫學論其卓有聲譽者亦
歷歷可考余束髮受書弱冠卽遊庠家貧橐筆
游燕趙齊魯間倖捷京兆試終年所揣摩者天
崇耶國初耶三山稿耶江浙四名家稿耶推而
至於墨選觀止崇辨堂求是齋還讀軒諸選本
而於醫學一門眞一門外漢也鼎革後解組歸
田杜門不出抱定厭世主義不復與聞當世事

每與友人談及謂讀經史費腦力讀小說又荒
唐有友勸余何不讀醫書謂能有益身心余乃
購各種醫書讀之若涉大川茫無津涯因念花
甲以外之人何可再勞精疲神况讀書而不臨
症終覺徒然故亦旋得而旋失今春余老友錢
君祝唐命其哲嗣同增同高將乃翁心榮先生
手輯醫津一編請序於余余憶髫齡時習聞心
榮先生與心坦心廣先生同稱爲錢氏三鳳者
也亟取是書讀之覺簡而明詳而括洵乎遠則